

## 1. ԸՆԴՀԱՆՈՒՐ ԴՐՈՒՅԹՆԵՐ

- 1.1. Սույն կանոնադրությունը կարգավորում է Երևան քաղաքի ավագանու «Ազգային առաջընթաց» խմբակցության (այսուհետ՝ նաև խմբակցություն) գործունեությունը, նրա մարմինների, ղեկավարի, քարտուղարի, անդամների իրավասությունների, լիազորությունների շրջանակը, աշխատանքային ընթացակարգերը և այլն:
- 1.2. Երևանի ավագանու 2023թ. սեպտեմբերի 17-ի ընտրությունների արդյունքների համաձայն «Ազգային առաջընթաց» կուսակցության առաջադրմամբ ընտրված ավագանու անդամներն ընդունում են Երևան քաղաքի ավագանու «Ազգային առաջընթաց» խմբակցության կանոնադրությունը:
- 1.3. Խմբակցությունը գործում է ՀՀ Սահմանադրության, «Տեղական ինքնակառավարման մասին», «Երևան քաղաքում տեղական ինքնակառավարման մասին» ՀՀ օրենքների, Երևան քաղաքի ավագանու կանոնակարգի, այլ իրավական ակտերի և սույն կանոնադրության համաձայն:
- 1.4. Խմբակցության գործունեությունը հիմնվում է բազմակարծության հարցերի ազատ քննարկման և կոլեգիալ որոշումների կայացման հիման վրա:
- 1.5. Խմբակցության անվանումն է «Ազգային առաջընթաց»:
- 1.6. Խմբակցության գտնվելու վայրի հասցեն է ք. Երևան Արգիշտի 1:

## 2. ԽՄԲԱԿՑՈՒԹՅԱՆ ՆՊԱՏԱԿՆԵՐԸ ԵՎ ԽՆԴԻՐՆԵՐԸ

- 2.1. Իրականացնել «Ազգային առաջընթաց» կուսակցության կողմից ընդունված Երևան քաղաքի մասին նախընտրական ծրագրում ամրագրված սկզբունքների և ուղենիշներին համապատասխան ծրագրային լուծումների կյանքի կոչման ուղղված գործունեություն:
- 2.2. Երևան քաղաքի և նրա բնակիչների առջև ծառայած բազմաբնույթ հիմնախնդիրների լուծման ուղղությամբ իրականացնել իր լիազորությունները և պարտականությունները:
- 2.3. Օժանդակել և աջակցել խմբակցության ավագանու անդամների կողմից ներկայացվող նախագծերի և ծրագրերի իրականացմանը:
- 2.4. Պաշտպանել Երևան քաղաքի և բնակիչների իրավունքներն ու օրինական շահերը:
- 2.5. ՀՀ օրենսդրությամբ սահմանված կարգով զանգվածային լրատվության միջոցներով տեղեկատվություն տարածել իր գործունեության վերաբերյալ:
- 2.6. Իր նպատակների, խնդիրների իրականացման համար համագործակցել բոլոր շահագրգիռ անձանց հետ:

## 3. ԽՄԲԱԿՑՈՒԹՅԱՆ ԳՈՐԾԱՌՈՒՅԹՆԵՐԸ

- 3.1. Խմբակցությունը իր նպատակների և խնդիրների իրականացման համար իրականացնում է հետևյալ հիմնական գործառույթները՝
- ա) աշխատանքները կազմակերպում է նիստերի, ժողովների, խորհրդատվությունների և հանդիպումների միջոցով,
  - բ) որոշում է ընդունում ավագանու հանձնաժողովներում խմբակցության անդամների մասնակցության վերաբերյալ,
  - գ) ավագանու իրավական ակտերի և դրանց ընդունման սահմանված ընթացակարգի համաձայն ներկայացնել խմբակցության անդամների նախաձեռնությունները և առաջարկությունները,

- դ) քննարկում և որոշում է ընդունում ավագանու նիստերին հրավիրել քննարկվող հարցի վերաբերյալ տեղեկացված այլ անձանց՝ ելույթ ունենալու, հարցերին պատասխանելու համար,
- ե) ամփոփում և որոշում է ընդունում խմբակցության գործունեության, կատարած աշխատանքների վերաբերյալ,
- զ) Երևան քաղաքի բնակիչների հետ կազմակերպում է հանրային հանդիպումներ, քննարկումներ բարձրացված հարցերին տալիս սպառնալից պատասխան,
- է) Երևան քաղաքի բնակիչների կողմից բարձրացրած խնդիրների և առաջարկությունների վերաբերյալ բարձրաձայնում է ավագանու նիստերում և հետամուտ լինում խնդիրների լուծմանը,
- ը) խմբակցությունը կարող է դիմել ՀՀ վարչական դատարան ավագանու և քաղաքապետի ակտերի իրավաչափությունը վիճարկելու հարցով,
- թ) իրականացնում է Հայաստանի Հանրապետության օրենսդրությամբ, ավագանու կանոնակարգով և սույն կանոնադրությամբ չարգելված այլ գործառույթներ:

#### **4. ԽՄԲԱԿՑՈՒԹՅԱՆ ՆԻՍՏԵՐԸ**

- 4.1. Խմբակցության հերթական նիստերը հրավիրվում են ավագանու նստաշրջանների ընթացքում ամիսն առնվազն մեկ անգամ խմբակցության ղեկավարի կողմից:
- 4.2. Խմբակցության ղեկավարի կամ անդամների մեկ երրորդի նախաձեռնությամբ կարող են հրավիրվել նաև արտահերթ խմբակցության նիստեր:
- 4.3. Խմբակցության նիստերը կարող են հրավիրվել նաև նստաշրջաններից դուրս՝ սույն կանոնադրությամբ սահմանված ընթացակարգով:
- 4.4. Խմբակցության ղեկավարը նիստից առնվազն երկու օր առաջ խմբակցության անդամներին տեղեկացնում է նիստի անցկացման օրվա, ժամի և տեղի մասին՝ նրանց տրամադրելով օրակարգը և դրանց առնչվող փաստաթղթերը, եթե այդպիսիք կան:
- 4.5. Նիստը վարում է խմբակցության ղեկավարը, իսկ նրա բացակայության դեպքում՝ խմբակցության քարտուղարը:
- 4.6. Խմբակցության ղեկավարի և քարտուղարի բացակայության դեպքում նիստը վարում է խմբակցության տարիքով ավագ անդամը:
- 4.7. Խմբակցության նիստում կարող է քննարկվել Երևանի ավագանու իրավասություններին, գործունեությանը, լիազորություններին վերաբերող ցանկացած հարց:
- 4.8. Խմբակցության նիստն իրավագոր է, եթե նիստին մասնակցում են խմբակցության ավագանու անդամների կեսից ավելին:
- 4.9. Խմբակցության նիստի օրակարգում ընդգրկված հարցերը քննարկվում են հետևյալ հաջորդականությամբ՝
  - ա) օրակարգի հաստատում,
  - բ) զեկուցողի ելույթ,
  - գ) հարցեր զեկուցողին,
  - դ) մտքերի փոխանակություն,
  - ե) քվեարկություն:
- 4.10. Նիստում յուրաքանչյուր հարցի վերաբերյալ քվեարկությունը կատարվում է տվյալ հարցի քննարկման ավարտից անմիջապես հետո:
- 4.11. Խմբակցության անդամը կարող է հրաժարվել քվեարկությանը մասնակցելուց:
- 4.12. Խմբակցության նիստում որոշումներն ընդունվում են, եթե դրանց կողմ են քվեարկել նիստին ներկա խմբակցության անդամների կեսից ավելին:

4.13. Խմբակցության նիստում քվեարկության արդյունքում ձայների հավասար բաշխվելու դեպքում վճռորոշ է նիստը վարողի դիրքորոշումը:

4.14. Նիստի արձանագրությունը, որը ներառում է խմբակցության նիստում քննարկված բոլոր հարցերի քվեարկությունների անվանական արդյունքները, ստորագրում է նիստը վարողը:

4.15. Խմբակցության նիստերին կարող են մասնակցել քննարկման ենթակա հարցերին իրազեկ անձինք, ինչպես նաև մասնագետներ:

4.16. Խմբակցության նիստերին կարող է մասնակցել խմբակցության փորձագետը և քննարկվող հարցերի, կատարված ուսումնասիրությունների, աշխատանքների վերաբերյալ կարող է ներկայացնել իր փորձագիտական եզրակացությունը:

4.17. Խմբակցության նիստերը կարող են անցկացվել առկա, առցանց և միաժամանակ՝ առկա և առցանց ձևաչափերով:

## 5. ԽՄԲԱԿՑՈՒԹՅԱՆ ԿԱՌԱՎԱՐՈՒՄԸ

### 5.1. Խմբակցության ղեկավարը՝

ա) ղեկավարում է խմբակցության գործունեությունը,

բ) գումարում է խմբակցության հերթական և արտահերթ նիստը,

գ) նախապատրաստում և վարում է խմբակցության նիստերը,

դ) կազմում և խմբակցության անդամների հաստատմանն է ներկայացնում խմբակցության նիստի օրակարգը,

ե) համակարգում է խմբակցության աշխատանքային խմբերի աշխատանքը,

զ) վարում է խմբակցության աշխատանքային խորհրդակցությունները,

է) կազմակերպում է խմբակցության ընթացիկ աշխատանքային գործունեությունը,

ը) վերահսկում է խմբակցության որոշումների և հանձնարարականների կատարման ընթացքը,

թ) ապահովում է խմբակցության որոշումների կատարումը,

ժ) աջակցում է խմբակցության, ավագանու անդամների աշխատանքներին,

ժա) խմբակցության նիստին հարցերի քննարկումներին մասնակցելու համար կարող է հրավիրել քննարկվող հարցին տեղյակ անձանց և մասնագետների,

ժբ) խմբակցության անդամներին տեղեկացնում է որոշումների կատարման ընթացքի մասին,

ժգ) ընդունում է (ստանում է) խմբակցությունից դուրս գալու խմբակցության անդամի գրավոր դիմումը, ինչպես նաև խմբակցության անդամին խմբակցությունից հանելու խմբակցության որոշումը և ներկայացնում քաղաքապետին սահմանված կարգով,

ժդ) նախապատրաստում և ավագանու քննարկմանն է ներկայացնում հարցեր, որոշումների և ուղերձների նախագծեր,

ժե) բյուջեի նախագծի և զարգացման ծրագրի վերաբերյալ խմբակցության դիտողությունները և առաջարկությունները գրավոր ներկայացնում է քաղաքապետին,

ժզ) համակարգում է խմբակցության փորձագետների և գործավարի աշխատանքները, տալիս հանձնարարականներ,

ժէ) իր հանձնարարությամբ փորձագետները և գործավարն աջակցում են ավագանու անդամների գործունեությանը:

### 5.2. Խմբակցության քարտուղարը՝

ա) խմբակցության ղեկավարի բացակայության դեպքում իրականացնում է ղեկավարի գործառնությունները և գործում է ի շահ խմբակցության,

բ) մասնակցում է խմբակցության հերթական և արտահերթ նիստի օրակարգի նախագծի մշակման աշխատանքներին,

- գ) վարում է խմբակցության անդամների խմբակցության նիստերին մասնակցության հաշվառումը,
- դ) ապահովում է խմբակցության անդամներին անհրաժեշտ նախագծերով ու փաստաթղթերով,
- ե) կազմակերպում է խմբակցությունում քննարկումների և խորհրդակցությունների անցկացումը,
- զ) հաշվետու է խմբակցությանը և հանրությանը:

## **6. ԽՄԲԱԿՑՈՒԹՅԱՆ ԱՆԴԱՄԸ**

### **6.1. Խմբակցության անդամն իրավունք ունի՝**

- ա) ընտրել և ընտրվել խմբակցության ղեկավար կամ քարտուղար,
- բ) խմբակցության և նրա ղեկավարին ներկայացնել նախագծեր, առաջարկություններ և նախաձեռնություններ,
- գ) իր քվեարկությամբ մասնակցել խմբակցության որոշումների ընդունմանը,
- դ) հարցեր տալ խմբակցության նիստում քննարկվող հարցի վերաբերյալ, հանդես գալ առաջարկություններով և նախաձեռնություններով, ելույթ ունենալ, դիրքորոշում հայտնել,
- ե) խմբակցության ղեկավարից ստանալ սպառիչ տեղեկատվություն խմբակցության գործունեության մասին,
- է) խմբակցության անունից արտահայտել դիրքորոշումներ, տալ հարցազրույցներ, վարել բանակցություններ, արտահայտել իր անձնական տեսակետը՝ հատուկ նշելով այդ մասին,
- ը) խմբակցության ղեկավարի հետ համաձայնեցնելով խմբակցություն հրավիրել քննարկվող հարցին իրազեկ անձանց, ինչպես նաև մասնագետների,
- թ) մասնակցել խմբակցության կողմից կազմակերպված միջոցառումներին,
- ժ) իր գրավոր դիմումի համաձայն՝ դուրս գալ խմբակցությունից և այդ հիմքով դադարեցնել իր անդամությունը խմբակցությունում,
- ի) իրականացնել ՀՀ օրենսդրությամբ և սույն կանոնադրությամբ սահմանված այլ իրավասություններ:

### **6.2. Խմբակցության անդամը պարտավոր է՝**

- ա) մասնակցել խմբակցության նիստերին,
- բ) մասնակցել Երևանի ավագանու և հանձնաժողովների նիստերին, բացառությամբ հիմնավոր խոչընդոտող հանգամանքների առկայության դեպքերի՝ առողջական, ընտանեկան, աշխատանքային խնդիրների, այլ երկրում գտնվելու, ազատության սահմանափակման, քաղաքացիական անհնազանդության և բոյկոտի գործողություններ, պարտադիր ներկայություն նախատեսող այլ միջոցառումների, ինչպես նաև քննչական, դատական ընթացակարգերի մասնակցության, ՀՀ օրենսդրությամբ և սույն կանոնադրությամբ սահմանված այլ դեպքերի, (քաղաքականան անհնազանդության կամ բոյկոտի բնույթ կրող միջոցառումներով պայմանավորված բացակայությունների մասին խմբակցության անդամը պետք է նախապես հայտարարի, իր ընտրությամբ՝ հրապարակային կամ գրավոր կարգով),
- գ) մասնակցել խմբակցության նախաձեռնած աշխատանքների իրականացմանը,
- դ) բացակայության դեպքում նախապես տեղեկացնել խմբակցության ղեկավարին կամ քարտուղարին՝ նշելով մասնակցության անհնարինության մասին,
- ե) իր գործունեությամբ ու վարքով բարձր պահել խմբակցության հեղինակությունը,
- զ) պարբերաբար հանդիպել համայնքի բնակչության հետ, ուսումնասիրել քաղաքացիներից ստացված առաջարկությունները, պատասխանել դիմումներին,
- է) իրականացնել ՀՀ օրենսդրությամբ և սույն կանոնադրությամբ սահմանված այլ պարտականություններ:

## 7. ԽՄԲԱԿՑՈՒԹՅԱՆ ԱՆԴԱՄԻ ԼԻԱԶՈՐՈՒԹՅՈՒՆՆԵՐԻ ԴԱԴԱՐՈՒՄԸ

### 7.1. Խմբակցության անդամի լիազորությունները դադարում են, եթե՝

- ա) ավարտվել է Երևանի ավագանու լիազորությունների ժամկետը,
- բ) նա կորցրել է համայնքի ավագանու ընտրական իրավունքը,
- գ) նա դատապարտվել է ազատազրկման,
- դ) նա անգործունակ է ճանաչվել դատարանի օրինական ուժի մեջ մտած վճռով,
- ե) նա անհայտ բացակայող կամ մահացած է ճանաչվել դատարանի օրինական ուժի մեջ մտած վճռով,
- զ) նա մահացել է,
- է) նա խմբակցությունից դուրս գալու դիմում է ներկայացրել,
- ը) նրան խմբակցությունից հանելու որոշում է կայացվել խմբակցության անդամների ընդհանուր թվի ձայների պարզ մեծամասնությամբ,
- թ) ՀՀ օրենսդրությամբ և սույն կանոնադրությամբ նախատեսված են այլ հանգամանքներ:

## 8. ԵԶՐԱՓՈՒԿ ԴՐՈՒՅԹՆԵՐ

8.1. Սույն կանոնադրության մեջ լրացումներ և փոփոխություններ կարող են կատարվել խմբակցության անդամների ընդհանուր թվի ձայների պարզ մեծամասնությամբ:

8.2. Սույն կանոնադրությունն ուժի մեջ է մտնում 2025թ. ապրիլի 1-ից: